



U akciji Lištica pretresi na 25 lokacija širom BiH

ODUZETO VIŠE OD 23 TONE DUHANA

Oduzeto je više od pet tona rezanog, oko 18 tona duhana u listu, tri mašine za sječenje duhana, veća količina novca u gotovini, četiri putnička vozila i više od 800 kutija cigareta različitih marki

Četnaest osoba jučer je lišeno slobode i privedeno na saslušanje u akciji kodnog naziva Lištica, koja je izvedena na području Gruda, Širokog Brijega, Čitluka, Zenice i Sarajeva, a u pretresima na 25 lokacija oduzeto je više od 23 tone duhana. Osumnjičeni se terete da su počinili krivično djelo organizovani kriminal u vezi sa nedozvoljenim prometom akciznih proizvoda, nedozvoljenim skladištenjem robe, poreznom utajom ili prevarom i pranjem novca.

Poznati odranije

Osumnjičeni su privedeni u prostorije **SIPA**, a saslušan je i veći broj svjedoka. Akciju Lištica pripadnici Državne agencije za istrage i zaštitu (**SIPA**) proveli su u saradnji sa pripadnicima Uprave za indirektno oporezivanje BiH, MUP-a KS-a, MUP-a HNK-a, MUP-a ZHK-a i MUP-a ZDK-a.

Tokom pretresa pronađeno je i privremeno oduzeto više od pet tona rezanog duhana, oko 18 tona duhana u listu, tri mašine za sječenje duhana, veća količina novca u gotovini, četiri putnička vozila, više od 800 kutija cigareta različitih marki bez porijekla i drugi predmeti koji mogu poslužiti kao dokaz u daljem postupku.

Pripadnici grupe za organizovani kriminal sumnjaju se da su od novembra 2015. do februara 2016. krijumčarili više desetina tona rezanog duhana i duhana u listu, koji su najčešće krijumčarili u količinama od nekoliko stotina kilograma, a u pojedinim slučajevima i više tona duhana, koji su potom prerađivali i rezali, te prodavali preprodavcima i krajnjim kupcima širom BiH. Tom

prilikom nisu platili fiskalne obveze i PDV koji su propisani zakonom, akcize, ni su duhan obilježili akciznim markicama.

Procjenjuje se da su privedena fizička lica (koja su pripadnicima UIO od prije poznata) svojim nezakonitim djelovanjem u periodu od tri mjeseca prodala najmanje 55 tona duhana, čime je budžet BiH oštećen za oko 7.850.000 maraka, pribavljena protivpravna imovinska korist veća je od 1.300.000 KM,



koju su, između ostalog, trošili za kupovinu nekretnina i skupocjenih vozila.

Kako nezvanično saznajemo, na području sarajevskog naselja Rakovica nađene su oko dvije tone sjeckanog duhana. U Zenici je nađeno 800 kilograma sjeckanog duhana i 16.000 cigareta, a na po-

dručju Hercegovine nađene su mašine za sjeckanje duhana. Interesantno je da su među kutijama cigareta pronađene i cigarete engleskih naziva, kao i paklice Drine, ali bez akciznih markica. Istragom bi se trebalo utvrditi da li su paklice Drine nabavili bez akciznih markica i od koga ili su ih osumnjičeni napravili. Dio duhana u listu kupljen je u Srbiji i legalno dopremljen u BiH, gdje su ga osumnjičeni počeli rezati, a da to nisu prijavili nadležnim institucijama.

Iz UIO pojašnjavaju da na jednom kilogramu duhana osumnjičeni zarade 105 maraka koje su trebali da uplate na ime PDV-a i akciza, što znači da bi za 23 tone pronađenog duhana budžet države bio oštećen za oko 2.415.000 KM.

Duhanska mafija

“Ovo je odlučna akcija agencija za provođenje zakona, u borbi protiv duhanske mafije koja čini veliki broj krivičnih djela, oštećujući budžet Bosne i Hercegovine za višemilionske iznose, čime se nanosi šteta svim građanima naše zemlje i stiče enormna nezakonita imovinska korist pojedincima”, saopšteno je iz Tužilaštva BiH.

Akciji je prethodila intenzivna kriminalistička istraga koju su istražitelji **SIPA** proveli pod nadzorom Tužilaštva BiH, s ciljem dokumentiranja nezakonitih aktivnosti osumnjičenih osoba, saopšteno je iz **SIPA**.

Nakon hapšenja, osumnjičeni će biti predati nadležnom tužiocu, koji će nakon ispitivanja donijeti odluku o daljim aktivnostima prema osumnjičenima. Dodajmo da je ovo nastavak akcije List koja je

izvedena prošle godine i u kojoj je oduzeto više od 10 tona duhana, koji je trebao završiti na crnom tržištu BiH.

D. PAVLOVIĆ
SKUPOCJENI
AUTOMOBILI
Budžet BiH
osumnjičena grupa
oštetila je za oko

7.850.000 maraka, a
od pribavljene
protivpravne
imovinske koristi od
1.300.000 KM kupovali
su nekretnine i
skupocjena vozila

Dio oduzete robe, koja je prodavana preprodavcima širom države

